

Bux Sooh Danc Gaanbul

Meanh xaux, lix baus ndeeul sooh neeh. Leeux mbaanx leeh deel gueh gaanbul. Hohdeec haec deel bail mbaanx feax eemh mbaanx feax gueh dangclaez gueh meeuz, ieh xic daaus dauc baaus haec ndael mbaanx gueh dangclaez gueh meeuz. Deel bail daaus dauc dangz xic heeh leeux mbaanx dauc jiez dooh nauz: “Mbaanx feax xic gueh hoongl ndaix ndil.” Deel hac aul nauz: “Gool hauxdais saaml waagt,” mizguanc deel xic nauz gueh: “Waagt hauxdais saaml gool.” Leeuxboz xic reeul xonz haaus deec dangz meanh nix.

Xooix Legmbegt Ndeeul Bail Aabk

Lix xooix legmbegt ndeeul. Xez deel haslix neec deec, deel ndinghal buxduz deel ngonz ngonz bail baangx dah aabk.

Lix ngonz ndeeul deel bail baangx dah aabk. Diec deel miz reenl deel dauc raanz naaus, diec deel xic hooznyaz, riuc ndaix seenc faix ndeeul bail baangx dah ral deel.

Diec deel reenl deel qyuh baangx dah aabk, diec deel xic ndaix faix haaix deel, xaauh riez deel. Xooix legmbegt deec xic ndingh daic ndingh bail raanz. Xaab daaus deec dauc, deel xic miz ngonz ngonz bail baangx dah aabk bais.

Odt Riez Gueh Raag Leengz

Meanh xaux lix bux sooh ndeeul, deel hac bail gueh raag leengz basdul raanz feax. Deel xic aul waais odt riez deel gueh ndeedt, ieh xic bail gueh raag leengz.

Xez deel mboodk aul leengz deec, leengz hoongz deel miz rooxnyiel. Laaux sucraanz deec rooxnyiel xic seedt dauc eemh, yius reenl deel mboodk aul leengz xic laih deel. Bux sooh deec nauz: “Gul duc ndaix waais odt riez gul ndil leeux baic leez, hohsul guehmaz haslix rooxnyiel mus?” Gaais suans nix xic haslix reeuz dangz xez nix.

Duez Lingz Neec Saanl Jobt

Ndianl lumh, duez lingz neec saanl banz saaml ndeenl jobt ndiljaiz laauihhoh, deel xic songs bail haec saaml buxduz xomc, duez meeuz neec, duez mooil neec, hal duez yuangz neec. Hohdeec aangh leeux. Mizguanc duez lingz neec jumh jauc, nauz: “Meeh heh! Gul miz lix jobt xomc!” Duez mooil neec xic nauz: “Duez lingz neec, miz haec ruangh, dauc hohdul baangl mengz saanl jobt.” Hohdeec saanl banz gaais guangz wal ndeeul haec lingz neec. Lingz neec xic xomc jobt ndiljaiz geh leeuxboz.

Rog Raul Hal Wenz

Lix bux wenz ndeeul gaab ndaix duez rog raul ndeeul. Deel hac gac duez rog raul deec, duez rog raul deec nauz: “Xaaml mengz nyac gac gul, xaaml mengz xuangs gul. Mengz xuangs gul ieh, gul bail gaab aul jongs duez rog raul dauc haec mengz.”

Bux wenz deec nauz: “Mengz banz dangcnix, laaul guaslangl hoh buxduz mengz deec aul ngaix mengz haais guehleeux deeml. Mengz xic aanh banz gac jiezraaix.” Gueh dangcnix nauz, duez rog raul deec xic ngaix deg gac bais. Faangx laez hac haais feax, ndaanglgaus deel aul deg gac goons.

Baex Miz Jaiz Yah

Meanh xaux lix yah ndeeul dal ruez. Lix ngonz ndeeul, baex deel gacloox deel, nauz: “Naic, gul aul hauxxiz xus ndael ringc haec mengz noox.” Ieh baex deel xic daaus aul bail xus jiezh ndooil.

Guas ndaix gus ndeeul, yah deec xic bail ndael ringc aul hauxxiz dauc genl, deel xic aul fengz bail jumh ndael ringc aul hauxxiz, jumh yac jumh miz ndaix.

Baex deel qyuh ndael roog reeul. Mbanh nix yah deec xaax rooxheeh baex deel gacloox deel, deel xic byaaic dauc basfiz nangh, deel gah ndiabk xic daic sazegt leeux.

Ndael Raanz Hooc

Lix xooix ndeeul, raanz deel hooc laail, miz lix xeenz xex wasbeah haec deel deenc. Mac deel xic aul bangz gaus dauc gueh wasbeah haec deel. Deel deenc ndaix soongl daaus xic rooix bais. Deel riangz mac deel nauz: “Mac, wasbeah gul rooix miz banz deenc bais, xex doois wasbeah moos ndeeul haec gul bais.” Mac deel haanl nauz: “Weangl deel gueh ndil xic banz deenc ndais, raanz rauz miz lix xeenz xex.” Mac deel weangl gueh ndil haec deel. Ieh deel deenc bail jaangl luangs, reenl feax deenc ndil, deel xic ruangh laauhhoh. Bux bux duc gohsiz deel.

Duez Xiez Dungx Damc

Lix raanz ndeeul xiangx daag xiez laaux ndeeul, dungx damc qyah laauhhoh. Lix haadt ndeeul, leg raanz deec xuangs bail dungx bungz riangz duez xiez daag raanz ndooil. Daag xiez laaux deec xic riangz daag xiez raanz ndooil deec dungx damc, xic dungx damc qyah laauhhoh. Dungx laih jiez bail jiez, xic haaix damc daag xiez raanz ndooil deec dius raans bail lac, haaix ooh soongl leg deec wangc leeux. Hohdeec laaulhis duez dius bail lac deec daail, hohdeec rongz bail lac eemh, duez xiez deec miz daail, mizguanc gal ndeengc bais.

Bux Xomh Daans Hal Bux Ruaauz Bangz

Lix bux wenz xomh daans ndeeul, qyuh ndeenl raanz ndeeul xomh daans. Deel yius reenl bux ruaauz bangz ndeeul bianh raanz dauc heenz raanz deel qyuh. Deel yius reenl xic aangh leeux, soohnyaangh seedt bail riangz faangx deec nauz: “Rauz dungx qyuh jiez dooh ieh bais, dungx qyuh jiez dooh seeuc yungh xeenz, yac ndaix dungx baangl.” Bux ruaauz bangz deec nauz: “Gaais haas mengz nauz nix ndil jiezraaix, mizguanc aanh gueh miz dangz. Yincwooil, gul deg bux ruaauz bangz, mengz deg bux xomh daans. Dangz guaslangl gaais bangz haaul gul deec, mengz aanh haaix foonx haec gul.” Soongl bux nix miz dungx xamh yaangz hoongl xic dungx qyuh miz banz.

Degt Geec Ral Waaiz Miz Reenl

Lix haadt ndeeul, lix jic xooix bail daez duez, laih duez bail dangz ndael bool. Leeuxboz xic nangh degt geec, miz eemh duez maz. Dangz xez lac bail raanz deec xaaux bail eemh duez, lix xooix ndeeul ral waaiz miz reenl bais. Deel xic bail raanz ndooil.

Bail dangz raanz, diec deel hams deel: “Waaiz gox?” Deel xic haanl: “Waaiz ral miz reenl.” Diec deel xic hudt deel nauz: “Bail daez duez xingh guehxamz, miz eemh duez. Xaamx duez genl haux feax, mengz xic gueh dangclaez gueh mus? Daaus bail ral duez dauc raanz miz.” Ieh deel xic daaus bail bool ral waaiz dauc raanz.

Dingh Xooix Legmbegt Ndeeul Gueh Baex

Lix xooix legmbegt ndeeul ndaix xib bil laail, lix raanz ndeeul dauc gaangc deel gueh baex. Lix ngonz ndeeul, lix soongl yah riuc ndaix dunc hauxnangc ndeeul dauc dangz raanz deel. Deel xic hudt soongl yah deec, ieh xic xuil yah ndeeul goongl basfiz. Ieh xic daaus aul hauxnangc bail daauc xus xaaus mul.

Mbanh nix mac deel hooznyaz xic aul faix bail laih deel, deel xic henc bail genz luz. Nuangx deel xic seedt bail mbaagt lail dool mac deel, miz haec mac deel henc bail genz haaix seeh deel.

Ieh mac deel xic daaus bail basfiz nangh. Guaslangl seeh deel rongz dauc lac, mac deel yac miz haaix deel bais, xic ndah deel ndooil.

Duez Mbucmbedt

Meanh xaax, xez xaax lacmbenl deec, bux wenz miz rooxheeh yaangzmaz. Baus laauxdooz baais haec duez mbucmbedt bail heeuh, aul faix ngoox gueh gaail, aul faix faaiz gueh saangh. Duez mbucmbedt xic xangcih heeuh daausbinc, nauz: “Jongs bixnuangx, aul faix faaiz gueh gaail, aul faix ngoox saanl saangh.”

Xez deec mbenl qyuh dams, wooil mbucmbedt heeuh daausbinc, wenz genl haux laail, xic lix eex laail, eex lomh mbenl, mbenl xic henc bail saangl geh. Baus laauxdooz xic hooznyaz mbucmbedt laail. Deel xic hudt mbucmbedt, nauz: “Mengz dungx qyah dangcnix, gul xic laih mengz ngonz ngonz aul bas bail mbooil eex.” Duez mbucmbedt gac gueh longl, ruangh gaais nac raiz leeux, miz roox gueh dangclaez ndil. Xaab xez deec dauc, mbucmbedt ngonz ngonz duc aul bas bail mbooil eex.

Duez Langx El Nangl Yuangz

Lix bux wenz ndeeul, xiangx ndaagt baangc yuangz, deel yac xiangx jic duez mal daez yuangz deeml. Heenz deec lix duez langx ndeeul hac dauc wanz aul genl duez yuangz, mizguanc deel ndillaaul duez mal, deel xic ndiabk: “Gueh dangclaez gueh nis?” Ieh deel xic ral ndaix yuaangs nangl yuangz ndeeul, roomc xus genz ndaangl dungxlumc duez yuangz nic. Ieh deel xic byaaic bail, duez mal miz ndaix eemh ndilriz.

Duez langx ndiabk nauz: *Duez mal miz reenl gul, gul xic ndaix genl duez yuangz gueh imh bais.* Duez langx aangh guas xic dangc riangl, riangl deel yac laaux yac xongx, xic xoonh dauc rooh bais. Wenz daez yuangz yius reenl, xic xaus jongs duez mal bail haab deel, yac sigt yuaangs nangl yuangz deel el deec gueh rooix leeux. Deel xic seedt deeuz ngas rianh leeux.

Jazjinh Hal Baussuc

Dungx Dax Duans Yaangzmaz Laaux Geh

Lix daaus ndeeul baussuc riangz Jazjinh nauz: “Jazjinh, dauc rauz dungx dax duans, mengz nauz yaangzmaz laaux geh?” Jazjinh xic haanl: “Baussuc, mengz nauz goons las.” Baussuc xic nauz: “Gul bail baaih genz yius reenl mbaanx ndeeul lix gool faix laaux ndeeul. Jic bux wenz dungx gaml jeenl duc umx miz leeux gool faix deec.” Jazjinh xic nauz: “Gul bail baaih lac yius reenl gool faix beeul ndeeul laaux laauihhoh, aul hooch ndeeul dauc bas, xic aul feangh ndeeul dauc gueh ruez, lix soongl bux wenz qyuh soongl jauc, bux heeh bux duc miz rooxnyiel. Mengz nauz gaais laez laaux geh?” Gaais baussuc nauz deec neec geh, baussuc xic sel Jazjinh bais.

Legneec Miz Bail Ninz

Lix xooix leg ndeeul, miz maaic bail ninz. Lix haamh ndeeul deel xic xingh daic, mac deel nauz deel bail riangz ninz, deel yac miz bail. Mac deel xic xeel deel gah nangh basfiz xic bail ninz bais.

Deel qyuh basfiz yac xingh daic, mac deel hooznyaz xic dauc xaauh deel bail baaih rooh, haabt dul xus deel, haec deel qyuh baaih rooh. Mac deel daaus bail ninz.

Ieh deel qyuh baaih rooh daic ngas rianh leeux. Guaslangl mac deel daaus bail xaauh deel dauc, aul deel bail riangz ninz, deel xaaux miz daic xic bail riangz mac deel ninz bais.

Gais Bux Hal Duez Bidt

Duez gais bux hal duez bidt bail baangx dah xunz. Gais bux jaailnauz ndaanglgaus deel nyeedt geh feax, deel xic reeul bidt nauz: “Soongl wal dinl mengz deec, lumc mbael faix nic, byaaic ronl mbidt baaih bail baaih, qyahfaz laauhhoh.”

Duez bidt nauz: “Mengz lix soongl gaais feadk ndiljaiz, mengz aanh mbinl ndaix jail laauhhoh nax!” Gais bux aul haec feax rooxheeh deel nyeedt banz dangclaez rauh, deel xic mbinl bail baaih unx, deel jazjaz mbinl dangz jaangl mbangx, xic dogt bail ndael dah, deel xic heeuh jaus. Duez bidt soohnyaangh yuz bail ndael dah jaus deel dauc rooh, riangz deel nauz: “Soongl wal dinl qyahfaz gul nix jaus ndaix mingh mengz.” Gais bux waaihnac xic miz lix xonz nauz, haaix nac ndingl leeux ndooil.

Legneec Daez Raanz

Meanh xaax lix legneec ndeeul, naic deel daail ieh, deel xic ndillaaul laail. Xaamx raanz deel bail bool gueh hoongl leeux, xic haec deel gah daez raanz. Deel xic miz qyuh raanz, xic qyuh rooh gueh xingh. Xaamx lix bux laez dauc baanx deel, deel xic qyuh raanz deel guehxamz, nauzxic genl haux. Xaamx miz lix bux laez baanx deel, deel xic miz bail raanz gueh yaangzmaz, deel xic qyuh baaih rooh guehxamz ngonz laabt, haux duc miz genl. Xac diec mac deel, nauzxic goc, seeh deel daaus nyal dangz raanz heeuh deel bail raanz, deel xaax bail, mizxic deel miz bail raanz naaus.

Dauc Legribt

Jic bil goons lix ngonz ndeeul, mbenl baaih ndeeul laabt, baaih ndeeul ndoongh, rumz yac laaux. Guaslangl xic dauc legribt laaux, yac dauc wenl laaux, xic haaix raanz nguax dees leeux, raanz haz yac beangc leeux, mbahyaangz ndael raanz yac lubt, biagt ndael naz yac nieh. Boz wenz bail rih bail naz deec, legribt dub jauc hohdeec, wenl yac sog ndaangl hohdeec lubt leeux, hohdeec xic aul lox gob genz jauc.

Boz bail rih daaus dauc raanz dangz baangx dah. Ramx roongz laaux laail, waaic dauc raanz miz ndaix. Lix jic bux legsaail xic bail gaml jeenl boz legmbegt waaic roongz, hohdeec xaaux dauc raanz ndaix. Bil deec xic xeeh leeux banz legribt laaux jaxxiz bais.

Jincjinc Hal Fah Waanl Neec

Lix xooix legsaail ndeeul, xoox nauz gueh Jincjinc. Xez Jincjinc haslix neec deec, diec deel xex ndaix fah waanl neec ndeeul haec deel, Jincjinc xic aangh leeux. Deel ganx reenl bux laaux bail ndael bool ramc faix, deel nih aul waanl neec deel bail xeh hauc miz hauc.

Deel bail dangz ndael sianl, riuc waanl neec bail ramc gool faix masdaauz neec ndeeul. Jincjinc nauz: “Ax! Hauc jiezraaix!” Jincjinc xic qyox fah waanl neec deel deec, gah gaangc aangh leeux.

Guas ndaix neec ndeeul, diec deel dauc dangz ndael sianl, yius reenl gool faix masdaauz deec raagt, xic hooznyaz laauhhoh. Ieh Jincjinc lingx longl diec deel. Diec deel xic riangz deel nauz: “Mengz ramc faix masdaauz, hohrauz xic seeuc gool faix masdaauz ndeeul bais, miz haec daaus ramc gool ndooil bais noox.”

Miz Gacnyiel Nauz

Lix ngonz ndeeul, lix jic xooix bail dooh sel daaus dauc raanz. Hohdeec dauc dangz jaangl ronl, yius reenl heenz ronl lix roongz doos ndeeul. Lix xooix ndeeul aul faix bail nyoooh roongz doos deec. Lix xooix ndeeul nauz: “Miz haec nyoooh, neec deeml doos dauc ndaadk rauz.” Mizguanc deel miz gacnyiel, deel xic aul faix bail nyoooh roongz doos deec. Doos xic dauc laih hohdeec. Xooix ndaix faix bail nyoooh deec seedt ndangh, lix xooix neec ndeeul seedt miz ndaix. Xooix nauz miz haec nyoooh deec doodt beah deel bail gomh jauc xooix neec deec, ieh ndaanglgaus deel ngaix ndaadk jic baiz. Xooix ndaix faix nyoooh deec seedt deeuz ndooil. Hohdeec xic hooznyaz deel laauihhoh.

Duez Gobt Ndael Mbooh

Lix duez gobt ndeeul nangh ndael mbooh. Duez rog neec mbinl dauc ndunl heenz mbooh. Duez gobt hams duez rog: “Mengz guas jiez laez dauc mus?” Duez rog haanl nauz: “Gul guas genzmbenl dauc, mbinl jail laail, roox hes xic rongz dauc lac ral ramx genl.” Duez gobt nauz: “Mengz nyac gaangc haaus laaux! Mbenl xaaux guaangs saauh genz mbooh nix ndooil, mengz mbinl saauh laez jail max?”

Duez rog nauz: “Mengz nih longl bais. Mbenl yius miz reenl ndeenl, guaangs laauhhoh!” Duez gobt reeul, nauz: “Gul ngonz ngonz nangh ndael mbooh nix, qyaux jauc xic reenl mbenl. Gul miz deg nih longl.” Duez rog reeul, nauz: “Mengz deg nih longl bais, miz sins, mengz yuaanc dauc genz mbooh qyox baiz ndeeul max.” Duez gobt xic yuaanc dauc genz mbooh, reenl mbenl guaangs jiezraaix.

Gaangc Haaus Gacloox

Meanh xaux, lix xooix neec ndeeul ngonz ngonz bail bool daez yuangz. Lix ngonz ndeeul, deel qyuh baangx bool heeuh: “Langx dauc geh, langx dauc geh!” Hoh baaih lac rooxnyiel hingl heeuh xic seedt bail hanl leeux, hams xooix neec deec, nauz: “Langx qyuh jiez laez?” Xooix neec deec reeul nauz: “Miz lix langx, gul gacloox hohsul guehxamz ndais!”

Guas ndaix jic ngonz, xooix neec xuangs yuangz deec daaus heeuh moos: “Langx dauc geh, langx dauc geh!” Hoh wenz baaih lac daaus ngaix gacloox lumc daaus goons.

Daaus guas ndaix jic ngonz, langx dauc jiezraaix bais. Xooix neec xuangs yuangz deec heeuh seens leeux: “Langx dauc geh, langx dauc geh!” Boz wenz qyuh baaih lac deec rooxnyiel hingl heeuh, mizguanc miz lix bux laez xangcsins lix duez langx dauc jiezraaix.

Duez Reenz Ndinghal Dongc

Lix ngonz ndeeul, duez reenz dez ndeenl xongl neec bail mbeadt need faixjiel. Mbeadt xus, mbeadt xus, ndeenl xongl neec deec mooz bais, haslix laams laail. Gueh dangclaez gueh mus? Xez deec, deel soohnyaangh yius reenl basdul raanz duez mooil lix ndeenl dongc, xic soohnyaangh bail aul ndeenl dongc deec.

Guas ndaix neec ndeeul, leg duez mooil hac genl ramx, duez mooil xic bail aul ramx. Miz reenl dongc bais, deel xic heeuh rianh leeux: “Bux laez ndaix dongc gul bail mus?” Duez reenz bail miz ndaix saauh laez jail xic rooxnyiel hingl heeuh, mbidt jauc qyox, duez mooil umx leg deel bansbic seens leeux, leg deel daic rianh leeux. Xez deec, duez reenz saml qyah qyuh, deel soohnyaangh songs dongc daaus dauc haec, haslix lingx longl duez mooil deec.

Miz Dungx Bih Genl Deenc

Meanh xaux, bux bux duc ndiabk aul genl ndil deenc ndil. Hohdeec sisxez deenc beah ndil xus ndaangl, haec feax rooxheeh hohdeec lix xeenz. Mizguanc lix bux sais ndeeul xoooh deel nauz gueh Sangc Jianh. Deel miz ndiabk genl ndil deenc ndil. Deel ndiabk gueh dangclaez aul haec wenzbeangz miz haec dungx bih genl deenc.

Deel lix jongs beah ndeeul miz rooxheeh deenc ndaix saauh laez bil bais, qyox reenl gaus leeux. Deel xic aul dauc saag gueh sael, ieh xic xingh deenc. Deel xingh gueh dangcnix deenc, boz wenz deec eemh reenl deel deenc gaais gaus, xic nauz: “Deel deg bux sais duc gueh dangcnix deenc gaais gaus, hohrauz lix yaangz maz aul dungx bih deenc gaais ndil nis!” Dangz langl hohdeec xic miz dungx bih genl deenc bais.

Xex Nooh Xingl

Meanh xaux, Jazjinh baangl raanz baussuc gueh hoongl. Lix ngonz ndeeul, baussuc heeuh Jazjinh dauc nauz: “Jazjinh, mengz bail jaangl jeex baangl gul xex soongl ganl nooh xingl ndeeul dauc.” Jazjinh xic bail jaangl jeex xex nooh. Jazjinh xex ndaix nooh xic ndingh xingl ndingh dauc. Baussuc yius reenl Jazjinh xingl nooh, deel xic heeuh: “Jazjinh, mengz guehmaz xic xingl nooh mus?” Jazjinh haanl: “Mengz nauz haec gul bail xex nooh xingl, gul xic ndingh xingl ndingh dauc.” Baussuc xic hooznyaz damh deeh leeux.

Baussuc daaus nauz haec Jazjinh bail xex nooh biz. Jazjinh xex ndaix nooh, xic ndingh biz ndingh dauc. Baussuc yius reenl xic heeuh: “Jazjinh, mengz guehmaz xic biz nooh mus?” Jazjinh haanl: “Mengz nauz gul bail xex nooh biz, gul xic ndingh biz ndingh dauc.” Baussuc xic daaus hooznyaz xams damh leeux.

Miz Roox Ndaml Naz

Meanh xaux lix xooix ndeeul bail riangz feax gueh rauh ndaml naz. Deel miz rooxheeh ndaml naz, xic saabt jac hoobt ngoomx, ndaml miz beangl neec laez. Hohdeec xic miz haec deel ndaml, xic nauz haec deel bail daih jac. Deel xic bail daih jac. Deel bail daih jac yac xingh goongl, leeuxboz xic reeul deel rianh leeux, ieh deel hooznyaz xic deeuz bail raanz.

Deel bail dangz raanz, mac deel xic hams deel: “Mengz guehmaz dauc raanz, miz riangz feax ndaml naz mus? Ndaml leeux baic maz?” Deel xic haanl: “Ndaml fih leeux, miz roox ndaml, xic dauc raanz ndaic las!” Mac deel daaus nauz: “Laaux saauh nix duc miz roox ndaml naz, dangz yianh nix gaail bail gueh baex feax xic gueh dangclaez ndil mus?” Deel daaus haanl nauz: “Xic miz gaail ndaic las.” Ngonz deec haaix ooh mac deel daaus bail riangz feax ndaml naz.

Uaail Jongs Bixnuangx

Meanh xaux, lix xooix neec ndeeul xoox deel gueh Gunghrungx. Gunghrungx lix goc, yac lix nuangx. Lix ngonz ndeeul, leeux raanz qyuh jiez dooh genl masgaaml, goc deel haec Gunghrungx aul goons. Gunghrungx miz leeh ndeenl ndil, miz jibt ndeenl laaux, aul ndeenl sooil neec deec.

Diec deel hams deel: “Mengz woil yaangz maz aul ndeenl sooil neec deec mus?” Gunghrungx nauz: “Gul bux neec, xic aul ndeenl neec, ndeenl laaux xeel haec goc genl.” Diec deel daaus hams: “Nuangx mengz miz neec geh mengz mus maz?” Gunghrungx nauz: “Gul deg goc, aul ndeenl laaux haec nuangx genl.”

Diec deel xic reeul nauz: “Mengz daz idt xeel haec goc, daz ngih xeel haec nuangx, mengz rooxheeh dungx uaail haec jongs bixnuangx xic ndil laauhhoh.” Gunghrungx ndaix sis bil xic rooxheeh dungx uaail, leeux raanz hanh deel. Gaais suans Gunghrungx uaail masgaaml nix reeuz dauc dangz ngonz nix.

Yaldaangc Ndinghhal Xalwac

Boohgenzmbenl xaax bux wenz daz idt, xoox deel gueh Yaldaangc, deel deg legsaail. Boohgenzmbenl gueh gaauh sianl laaux ndeul, gaauh sianl deec nauz gueh Yicdianl. Deel aul bux legsaail deec bail qyuh ndael sianl deec. Boohgenzmbenl xaax bux wenz daz ngih, xoox deel nauz gueh Xalwac, deel deg legmbegt. Hohdeec qyuh ndael sianl laaux nauz gueh Yicdianl deec. Boohgenzmbenl nauz haec hohdeec xicmaaic genl yaangzmaz duc banz. Gahdamx lix gool mas ndeul miz haec hohdeec genl.

Lix ngonz ndeul duez ngeaz nauz haec Xalwac genl gool mas Boohgenzmbenl nauz miz haec hohdeec genl deec. Xalwac ndinghhal Yaldaangc xic gacnyiel duez ngeaz nauz.

Guaslangl Boohgenzmbenl xic laih Xalwac ndinghhal Yaldaangc deeuz Yicdianl. Boohgenzmbenl nauz: “Hohsul miz gacnyiel haaus gul, xic qyuh baaih rooh sianl gueh hoongl naanh xaax ndaix genl.” Xaab Yaldaangc ndinghhal Xalwac gueh longl Boohgenzmbenl ieh dangz xez nix, bux bux xic lix longl.

Guehxamz Duez Waauc Haaix Raanz Saus Reemc

Lix bux wenz ndeeul, deel yius reenl duez waauc ndeeul qyuh xoongh xiangz. Deel xic ndaix jimz bail gaabk riangl duez waauc deec dauc rooh, ieh xic aul mail iadk gal deel, deel xic ndiabk: “Gul aul gueh dangclaez yas duez waauc nix nis?”

Ieh deel xic ndiabk dangz yaangz ndeeul, xic aul duez waauc deec bail jaangl biangh, daauc yuz xus ndaangl deel. Ieh xic aul fiz dauc leenz genz ndaangl duez waauc deec, fiz dez, duez waauc deec rooxnyiel ndaadk bais, xic bansbic jaangl biangh. Guaslangl fiz reemc leeux ndaangl deel, xic reemc mail iadk gal duez waauc deec gons bais, deel xic seedt bail hoz ndael raanz saus. Raanz saus lix mbahyaangz, yac lix nyas laail, xic haaix raanz saus reemc. Diec mac deel xic hudt deel ndil daail, ndilmaz lac gac deel.

Niaml Doois

Dangz xiangl laaux, raanz raanz duc aul niaml doois. Raanz baussuc raaz doois banz, xic heeuh Jazjinh bail niaml. Jazjinh aul doois genz yiangl weac raaz nauz: “Baus yah nangh biangh genz,” bail niaml xus hooch duez, aul doois hooch duez raaz nauz: “Xiez waaz riml lac xogt,” bail niaml xus genz yiangl weac.

Baussuc reenl Jazjinh niaml doois leeux, xic bail eemh hoz miz hoz. Baussuc yius reenl doois hooch duez qyuh genz yiangl weac, doois genz yiangl weac qyuh hooch duez. Baussuc xic heeuh nauz: “Jazjinh hax, mengz guehmaz xic gueh dangcnix niaml doois mus leex? Longl baic las!”

Jazjinh haanl nauz: “Raanz woois hooc, lix neec dauc duc miz ndaix dooh sel, ndeenl sel dal mbedt ndeul duc miz roox, eeh hoz miz hoz baic looh baus heh.” Baussuc xic nyaz damh deeh leeux, saail hooz ndilmaz lac sigt. Mizguanc, Jazjinh rooxheeh nac sel, deel xangchih gueh dangcnix dauc senh baussuc.